

Samningur

mennta- og menningarmálaráðuneytis

við Vopnafjarðarhrepp um ráðstöfun rekstrarframlags í fjárlögum til Fræða- og þekkingarseturs í Kaupvangi, Vopnafirði.

Mennta- og menningarmálaráðuneyti, kt. 460269-2969, í samningi þessum nefnt ráðuneyti, og Vopnafjarðarhreppur, kt. 710269-5569 í samningi þessum nefnt Þekkingarsetur, gera með sér svofelldan samning um starfsemi og þjónustu mennta-, menningar og fræðaseturs í Kaupvangi, Vopnafirði.

1. Markmið og starfsemi

1.1. Meginmarkmið með samningi þessum eru að:

- efla framhaldsfræðslu, námskeiðahald og símenntun auk þess að bjóða upp á aðstöðu til dreifnáms.
- skapa aðstöðu fyrir framhalds- og háskólanema og aðstoða rannsóknanema og vísindamenn við að koma á tengslum og útvega aðstöðu.
- styðja við rannsókn- og þróunarstarf með áherslu á menningu og ferðaþjónustu.
- stuðla að auknu samstarfi og samþættingu menntunar, rannsókna og fræðastarfs.
- styðja við starfsemi menningar- og ferðaþjónustu almennt í sveitarfélaginu..
- styðja við svokallaða Múlastofu, sem rekin er á Vopnafirði.

1.2. Starfsemi

- **Fjarnám.** Bjóða aðstöðu fyrir íbúa til símenntunar, framhaldsfræðslu og fjarnáms. Taka þátt í þróun námsleiða og/eða námskeiða á háskólastigi í samstafi við háskóla og sérfræðinga. Vinna með háskólum að bættri þjónustu við íbúa í formi fjarkennslu og staðbundins náms. Þekkingarsetrið stuðlar að miðlun þekkingar til alls almennings með fræðslu- og útgáfustarfsemi, sbr. ákvæði 2.7 og 2.8.

Rannsóknir og þróun. Vera miðstöð rannsókna- og þróunarstarfsemi í Vopnafirði með áherslu á rannsóknir og þróun í tengslum við sérstöðu Vopnafjarðar í náttúrufari, atvinnulífi og menningu. Stuðla að samstarfi fyrirtækja, mennta- og menningarstofnana og rannsóknastofnana um verkefni á sviði nýsköpunar og rannsókna.

Múlastofa. Áfram verði unnið að uppbyggingu á starfsemi Múlastofu.

2. Forsendur samnings og lagaheimildir

- 2.1. Framlag ríkisins til samnings þessa er ákveðið í fjárlögum hvers árs og er það 8,0 m.kr. árið 2011.
- 2.2. Ráðuneytið annast samskipti aðila vegna samningsins við fjármálaráðuneyti og Alþingi. Það mun beita sér fyrir því að árlegt framlag til samningsins verði í samræmi við gr. 2.1. með fyrirvara um að Þekkingarsetrið standi við skuldbindingar sínar. Gerður er fyrirvari um að stjórnvöld kunna að ákveða aðhaldsaðgerðir við samþykkt fjárlaga og á Þekkingarsetrið ekki kröfu á ríkissjóð eða rétt á bótum þótt framlag til samningsins verði lækkað eða fellt niður.



- 2.3. Verði gerð umtalsverð breyting á fjárveitingu til sammingsins í fjárlögum taka aðilar upp viðræður um aðlögun rekstrarins að breyttri fjárveitingu.
- 2.4. Framlag ríkisins skv. samningi þessum tekur breytingum samkvæmt verðlagsuppfærslu fjárlaga hvers árs.
- 2.5. Þekkingarsetrið starfar í samræmi við lög og reglugerðir sem gilda um umsamda starfsemi og verkefni, en einnig, eftir því sem við á: eftir lögum og reglugerðum um rekstur aðila sem kostaðir eru að verulegu eða öllu leyti af framlögum ríkisins.
- 2.6. Til þess að ná markmiðum sbr. 1.gr. mun Þekkingarsetrið m.a. með samstarfssamningi dags. 22. júní 2011 við Þekkingarnet Austurlands, beita sér fyrir margs konar námskeiðshaldi sem gerir almenningi kleift að stunda nám á öllum skólastigum með staðbundnu námi og fjarkennslusniði, kynna símenntun, veita ráðgjöf og bjóða uppá möguleika á námi og rannsóknum í heimabyggð m.t.t. sérstöðu svæðisins..
- 2.7. Þekkingarsetrið skal á hverjum tíma, í samstarfi við Þekkingarnet Austurlands veita upplýsingar um mismunandi tækifæri til náms á öllum skólastigum sem boðið er með fjarkennslusniði og koma þeim upplýsingum á framfæri við íbúa Vopnafjarðar. Leggja skal sérstaka áherslu á samstarf við menntastofnanir á framhalds- og háskólastigi

3. Ábyrgð styrkþega

- 3.1. Þekkingarsetrið ber ábyrgð á starfsemi sem samningur þessi tekur til og að hún fullnægi kröfum um fagmennsku og gæði. Þekkingarnetið skal geta lagt fram gögn og skýrslur þessu til staðfestingar, sé eftir því leitað.
- 3.2. Þekkingarsetrið ber ábyrgð á skuldbindingum sem það eða aðilar á þess vegum stofna til í tengslum við samning þennan.
- 3.3. Þekkingarsetrinu er óheimilt að:
 - 3.3.1. Afhenda, án skriflegs samþykkis ráðuneytisins, réttindi sín og skyldur samkvæmt samningi þessum í hendur þriðja aðila.
 - 3.3.2. Framselja greiðslur skv. samningi þessum til þriðja aðila og setja með öðrum hætti til tryggingar fjárskuldbindingu skv. 45. gr. laga um sammingsveð nr. 75/1997.

4. Upplýsingar, samskipti og eftirlit vegna fjármála

- 4.1. Ráðuneytið greiðir árlegt framlag sem hér segir:
 - 4.1.1. Í tólf jöfnum hlutum og er miðað við að greiða fyrsta dag hvers mánaðar. Greitt er inn á bankareikning í viðskiptabanka Vopnafjarðarhrepps.
- 4.2. Þekkingarsetrið skilar ráðuneytinu:
 - 4.2.1. Áætlun um rekstur og sjóðshreyfingar ásamt starfsáætlun, þar sem fram komi m.a. hvernig er áætlað að ráðstafa framlagi og helstu starfsmarkmið sem unnið verður að, fyrir lok janúar ár hvert.
 - 4.2.2. Endurskoðaðan ársreikning ársins á undan með skýringum, fyrir lok júní ár hvert.
- 4.3. Eigi Þekkingarsetrið í viðskiptum við lögaðila sem það á eignarhluta í eða er í eigu fjárhagslegra tengdra aðila svo sem stjórnenda hans, eða annarra aðila, skulu þau fara fram á viðskiptalegum forsendum og gerð grein fyrir þeim í ársreikningi.

5. Upplýsingar, samskipti og eftirlit vegna verkefna

- 5.1. Ráðuneytið hefur eftirlit með framkvæmd sammingsins.
- 5.2. Fulltrúar ráðuneytis og Þekkingarsetursins funda að lágmarki árlega um samninginn.

- 5.3. Fyrir lok júní ár hvert skilar Þekkingarsetrið ráðuneytinu greinargerð um framkvæmd samningsins, hver staða verkefna er og hvernig framlagi var ráðstafað í samanburði við áætlun.
- 5.4. Þekkingarsetrið skilar ráðuneytinu upplýsingum sem það kallar eftir vegna opinberrar upplýsingagjafar.
- 5.5. Þekkingarsetrið veitir ráðuneytinu upplýsingar sem það kallar eftir vegna eftirlits með framkvæmd samningsins. Ráðuneytið hefur heimild til að gera sjálft eða fela öðrum að gera athuganir og úttektir á öllum eða einstaka þáttum í framkvæmd samningsins. Í því sambandi hefur það óheftan aðgang að öllum gögnum sem máli skipta, þar á meðal fundargerðum, skrám, fylgiskjölum, skýrslum, bókum og bréfum.
- 5.6. Samning þennan, ársreikning Þekkingarsetursins, greinargerð um framkvæmd samnings og úttektarskýrslur skal birta á vef Þekkingarsetursins jafnóðum og þessi gögn liggja fyrir. Ráðuneytinu er heimilt að birta gögnin á vef sínum.
- 5.7. Þekkingarsetrið setur á vefsíðu sína ýmis gögn sem eru efnislegar afurðir verkefnisins, svo sem skýrslur, leiðbeiningar og áætlanir.


6. Vanefndir og meðferð ágreinings


- 6.1. Þekkingarsetrið tilkynnir ráðuneytinu tafarlaust ef það telur vafa leika á um að það geti uppfyllt skyldur samkvæmt samningnum. Jafnframt greinir stofnunin frá úrræðum sem hún hyggst grípa til.
- 6.2. Ráðuneytinu er heimilt að draga úr greiðslum, stöðva greiðslur og endurkrefja um greiðslur uppfylli Þekkingarsetrið ekki skyldur sínar samkvæmt samningi þessum.
- 6.3. Samningsaðilar munu leitast við að jafna ágreining, ef einhver er, sín á milli.
- 6.4. Dómsmál sem rísa kann út af samningi þessum skal rekið fyrir Héraðsdómi Austurlands.

7. Gildistími og lok samnings

- 7.1. Samningurinn gildir frá 1. janúar 2011 til 31. desember 2013.
- 7.2. Hvor aðili um sig getur óskað eftir því að einstök ákvæði samnings þessa eða samningurinn í heild verði tekinn til endurskoðunar, enda séu færð fyrir því efnileg rök. Endurskoðun skal þá hefjast svo fljótt sem verða má.
- 7.3. Óski annar hvor samningsaðila að semja um áframhald eftir gildistíma samningsins skal hann koma því á framfæri fyrir lok febrúar það ár sem samningurinn rennur út.
- 7.4. Óski annar hvor aðila eftir að segja samningnum upp skal það gert skriflega með þriggja mánaða fyrirvara
- 7.5. Samningur þessi er gerður í tveimur samhljóða eintökum og heldur hvor aðili eintaki.

Reykjavík 21. desember 2011


 Mennta- og menningarmálaráðuneyti
 Katrín Jakobsdóttir ráðherra


 Vopnafjarðarhreppur
 Þorsteinn Steinsson, sveitarstjóri



SVEITARSTJÓRINN
VOPNAFIRÐI